

Sèn Jan ai 20 de mé 2022  
**COMUNICAT STAMPA**

**I segnalibres del concors “L SEGNALIBER CHE VOLESSE” doventa TEILA per fornir su nesc paijes co l’identità e la cultura ladina!**

**L bon ejit del concors “L segnaliber che volesse”, endrezà via per l 2021 da la Biblioteca ladina “Père Frumenzio Ghetta” de la “Majon di Fascegn”, l à dat gaissa de durèr pèrt di dessegnes rué ite ence per meter en esser na campagna identità sul teritorie, per seghitèr a meter en pratega l obietif de “jir fora per la strèdes” e fèr viver l Istitut fora dai ujes de l’istituzion. Va inant belapontin la emprometuda de tor ite l teritorie portan tel concret l slogan «Mia majon, mia storia, mia parlèda».**

**I segnalibres regoec i é stac duré per l calandèr e l planner ladins 2022, publiché sul sit del Istitut ladin e sui social e, da anché enscin la fin de otober, na pèrt se la vedarà tachèda fora te duta Fascia tres de bela gran teiles da color. L zil l é de chiamèr endò l’atenzion su l’empordanza de engaissèr la jent a viver sia identità. L é na vida desvaliva, da color e feruscola per ge dèr na neva parbuda a nesc paijes, percheche la “Majon di Fascegn” l é l’istituzion ladina per ezelenza, ma l é ence e soraldut Fascia, majon belapontin, cèsa di fascegn e lech olache la jent cogn stèr bel sorì, per viver o per passèr sia vacanzes.**

**Amò apede chesta scomenzadiva vel ence sparpagnèr fora e fèr cognoscer l nef logo de la Majon di Fascegn, jit fora la pruma outa ai 21 de oril.**

**Se aon podù embeletèr Fascia con chesta parbuda identità l é amò n’outa de gra a la colaborazion de la persones e de la istituzions del teritorie.**

**N detelpai sinzier ge l dijon donca a duc chi che à tout su con gaissa chesta scomenzadiva:**

la aministrazions de comun, la Scola Ladina de Fascia, la scolina e la scola mesèna de Ciampedel, la Coprativa de Fascia, la Cèsa de Pausa, l curat de Moena, l Park Hotel Avisio de Soraga, Bruno de Martin da Vich, la lescivèra Da Marta e la familia Winterle de Pera, i Studafech da Poza, la pizeria Udai a Mazin, l Soggiorno Dolomiti a Ciampestrin, la palestra de rampinèda ADEL a Ciampedel, l restorant Tobià de Zeli a Dèlba, l restorant Agnello de Ciampedel, l curat e la Majon Roces de Cianacei e l Bar de Penìa.

Con chesta vertola vegn portà dant ence na **endesfida**. Duc chi che à tout pèrt a desvaliva vides a chesta scomenzadiva, ma ence duc chi che à gust, **vegn envié a chierir i banner** fora per la val e **a ge manèr ite a la biblioteca ([biblioteca@istladin.net](mailto:biblioteca@istladin.net))** sia fotografia, che la vegnarà publichèda su la piata facebook **@te biblioteca del Istitut Cultural Ladin**. Ve speton de n muie!

(AR/ar)